

摘藻堂四庫全書薈要

集部

欽定四庫全書薈要卷一萬八千三百二十五

集部

御選宋詩卷十八

五言古詩九

高登

思歸

忽忽已秋杪言歸欣有期  
節物想吾廬青蕊繁東籬  
流匙白雲子蘸甲黃鵝兒  
對此憶羈旅多應歌式微  
喜慰倚門心愁消舉案眉  
稚子開簷隙繞膝牽人衣  
歸興念

如許兼程猶苦遲  
明朝秋色裏  
烏帽風披披

張綱

次韻國衡

古寺憑岡蒼煙蔭喬木  
欹斜屋鱗比繚繞牆帶東  
何人闢層軒延客寄遐矚  
醉賞菊坡下客意豈在菊  
念昔居此地名世盡儒服  
師曠賢多知蒼史聖重目  
臺成竟誰遊事去不容跼  
梁王高帝孫名字亦不辱  
當時盛歌舞肯使後人逐  
陳迹今故存新池為誰綠  
感歎世上事

翻覆如轉燭請君聽鐘魚尚想吹紫玉

張九成

山中見柿樹有感

茲山余初來掩冉柿葉青相去未三月柿花亦已零及  
茲尋去路纍纍滿空庭人生豈無情眷眷不忍行嚴霜  
八九月百草不復榮惟君粲丹實獨挂秋空明寄語看  
園翁勿使墮秋風願比櫻桃春置之大明宮

正月二十日出城

春風驅我出騎馬到江頭出門日已暮獨行無獻酬江  
山多景物春色滿汀洲隔岸花遠屋斜陽明成樓人家  
漸成聚炊煙天際浮日落霧亦起羣山定在不江柳故  
撩人縈帽不肯休風流乃如此一笑忘百憂隨行亦有  
酒無地可遲留聊寫我心耳長歌思悠悠

二十六日復出城

杜門不肯出既出不忍歸借問胡為爾江山樓落暉濯  
濯漱寒玉青青入煙霏柳色明沙岸花枝作四圍玉塔

天外小漁舟雲際微興遠俗情斷心閒人事稀我本江湖人誤落市朝機計拙物多忤身臞道則肥所以此勝槩一見不我違吟餘尚多思白鳥背人飛

十二日出城見隔江茆舍可愛

茆屋臨江上四面惟柴荆綠陰繞籬落窗几一以明門前灘水急日與白鷗盟不知何隱士居處復何營朝來四山碧晚際沙鳥鳴碁聲度竹靜江深琴調清終攜一樽酒造門相對傾心期義皇上安用知姓名

菖蒲

石盆養寒翠六月如三冬  
勿云數寸碧意若干丈松勁  
節凌孤竹虬根蟠老龍傲霜滋正氣泣露泣春容座有  
江湖趣眼無塵土蹤終朝澹相對澆我塊壘胸

三月晦到大庾

我登超然臺積雨久不止  
臺下柳成行掩映盈塘水環  
塘率喬木倒影弄清泚恍如  
在故鄉西湖古寺裏氣象  
極幽深景物盡蒼翠十年勞  
夢想一夕居眼底獨坐不

能去頽然起深思鐘鳴主人歸燭光何煒煒笑語復移時夜久余當起歸路夫何如江聲寒玉碎

十一月忽見雪片居此七年未嘗有也

寒色遽如許神清瘦不禁瓦溝聲磔索珠琲亂衣襟斯須忽復變玉屑墮前林風勁勢回旋飄飄蔽遙岑落此炎瘴地七年到於今不見六花飛况聞寒玉音今年盈尺瑞天以慰吾心呼兒具杯盤開樽須滿斟更製白雪辭入我綠綺琴



辛未閏四月即事

窮居不擇交賢否那復辨似人輒已喜况復曾半面相  
見且寒溫不問風雨變晚來無與遊澄江喜如練攜筇  
信步行屈曲隨山轉數日雨不止衝波頽激箭舊雨已  
不來今雨誰復見甕頭香滿屋吾計今已辦豈復思故  
鄉無事且彊飯

種槿已五載入門幽徑深拒霜偶然植亦解成清陰晚  
涼新浴罷松風披我襟終日岸巾坐間無人見尋浩然

媚幽獨發興付瑤琴

寓居城中寺蕭然如深山終年客不到終日門亦關晨  
朝香火罷去履脫危冠飽讀古人書會意有餘歡客有  
饋荔枝薦以碧玉盤吟哦更咀嚼未羨朱兩轡鮫綃作  
紅皺護此冰肌寒

擬古

山色翠按藍杯中酒如玉飲酒彈瑤琴漫奏流水曲音  
微澹無味絃緩軫不促不須苦求知古人有遺躅推琴

金少府人卷十八  
一長嘯清風振吾屋

秋興

秋意入茆屋杖策登平原落日銜西山一川頓明鮮  
蕭江上竹溜溜巖下泉我生本閒放胡為此拘拳身世  
兩相違於今六十年勇退未為怯銳進豈其賢

半夜驚夢回桐葉紛索索杖藜視天宇雨罷雲收脚清  
風拂襟裾片月墮籬落嗟我遊已倦悵此久淹泊豆畦  
今已花稻隴行可獲翻思黃卷中古人誰可作田園愛

潛歸簞瓢識顏樂  
譬彼鷦鷯心平生  
在叢薄

多雨偶成

謫居天南陲  
終年寡儔侶  
四月山氣行  
淋漓滿城雨  
獨坐北窗下  
蕭然無一語  
睡起復何如  
雞鳴已亭午

黃公度

還家

黎明呼羸僮  
拄策渡野水  
輕嵐翳初日  
古道步平砥  
麥隴黃四出  
松竹翠相倚  
人間春告盡  
巖邑秀未已  
眼入

故鄉明語還親舊喜印非朱買臣金無蘇季子竊笑免  
妻孥相過動隣里富貴豈吾謀薄遊聊爾耳

謝傳參議彥濟惠笋用山谷韻

北方九月霜賓盤無生菜嶺南信地暖窮冬竹萌賣君  
念庾郎貧繭栗供庖宰中有歲寒姿經時久不壞前身  
渭川侯千畝償宿債珍可配天花賤不數石芥早薤與  
晚菰奴僕望賓介文園酒渴餘想不厭姑嘬預恐吹作  
竹明日東風噫急須驅兒童傾筐攜采采

劉子翬

涼月

涼月未出山浮雲半空白徘徊步軒窗宛若待佳客經  
林漏飛輝映澈生華澤及茲秋景清吾廬更幽寂殊觀  
發祕藏妙聽生寥閭營營息初機炯炯懷新得豈無平  
生心所樂已非昔天旋河漢動夜久隣機息淒淒感庭  
蘭歲暮霜霰集呼兒溫濁醪獨酌醉永夕

渡淮

鳴聲渡長淮霏煙散清晨皎皎初日光照耀草木新橫  
林度餘碧疊峰開嶙峋移橈失向背煙波浩無垠兒童  
相棹歌余心亦欣欣輕帆互相踰畫鷁映流津徘徊望  
洲渚悠然獨懷人樵漁有棲遯寂寞誰問隣暮風翻洪  
濤魚蝦亦有神四顧天地黑孤舟恐漂淪

獨坐

獨坐高樓上游觀思無極重門雖晝關遠岫如不隔長  
林葉布陰淺澗流波激欣欣物態榮淑氣生原隰幽禽

感時鳴遶樹飛還集常恐逐驚飆無階戀傳匹興懷念  
良遊歲月更相及佳人獨棄予何以慰岑寂褰裳迷所  
向望遠時佇立心知徒百憂沉思不能釋

阻風

晚歲多悲風江湖浪崢嶸扁舟渺無依日暮猶孤征重  
岡擁滯霧迴隰飄浮雲繫舟古岸邊纜斷舟復橫天寒  
鴻雁稀滯留知旅情頽崖震林谷客子心夜驚披衣待  
清曉缺月西南明遠遊多所懷益遣歸思盈



題嬾庵

地偏賓至稀  
晝靜門常掩  
深房紙瓦明  
宴坐蒲團穩  
庭花落未埽  
徑草繁不翦  
林泉倦出遊  
况乃市朝遠

晨興

晨興訪蕭寺  
爽氣清如沐  
坐看雨離山  
飛陰斷平陸  
歸途阻夕漲  
竚立驚幽獨  
曳杖聽殘鐘  
却寄僧房宿

懷致中

夢覺殘夜永  
山寒氣逾清  
林幽萬籟息  
月出虛堂明  
披

衣坐復起懷人思空盈經時不對面素榻浮埃生遙知  
念盍簪臨風亦關情褰帷望歧路慨然欲宵征無人道  
我先何因識門庭仰憑鴻雁飛書詞寫深誠詞多意莫  
宣益遣幽恨并

棄竹夫人

愛憎情易遷感物思鬱紆念昔未棄捐嘗侍君子居煩  
襟一披豁雅抱何清虛蹉跎怨時暮涼德竟見疎飛霜  
皓中庭枵然委牆隅的皪珠幃深焚煌錦茵鋪豈不懷

舊恩君心已非初當年紉扇謠抱恨同區區

遊龍潭

四客同笑言一僧陪杖屨徜徉山水窟適意忘晨暮疎  
鐘巖北寺細竹溪南路中流石參錯不礙潺湲注泓澄  
小龍潭潤氣金碧聚時驚木葉墜俯見儵鱗度斯遊非  
預期偶爾造佳處幼輿丘壑情陶令琴觴趣淹留慰所  
願惟以賓友故夕陽淡寒山遲回不能去

和李巽伯春懷

山寒古寺清斷續春朝雨遙憐遠客情寂寞誰晤平生  
生氣軒昂失意今易與有酒即佳晨無兵皆樂土微吟  
對節物林靜幽花吐悠悠念鄉邑耿耿悲豺虎知有濟  
時才縱橫在談塵功名恐未遲老翮期更舉

負暄

宵寒臥增裯晝寒起增衣何如負暄樂高堂日暉暉引  
光扉盡闔追影榻屢移妙趣久乃酣瞑目潛自知初如  
擁紅爐凍粟消頑肌漸如飲醇醪暖力中融怡欠伸百

骸舒爬搔隨意為稍回驕佚氣頓改酸寒姿薰然沐慈  
仁天恩豈予私願披橫空雲四海同熙熙矯首望扶桑  
傾心效園葵

木犀古風

化工吝幽香斑斑被花木氤氲寒巖桂高韻蓋羣馥無  
人盡日芳守志何幽獨士介恥求知女貞慙自鬻淒涼  
楚山秋樛枝吐金粟淺水映輕明微飈發含蓄樓端靜  
忽聞馬上遙相逐跼蹐為延佇但見林巒綠綰罌誰折

贈清芬閔廬屋久處不自知乍至彌鬱郁客悲芳歲暮  
夢遶寒溪曲長吟小山詞古意恐難復

春寒偶書

浮雲匿晨暉雨電驚春晝天公號令乖陰晴變何驟小  
徑踐芳泥通渠走寒溜風顛萬木偃氣凜重聞透鴟鷂  
護巢翔奈此羣雛幼擁爐烏薪然雙手慵出袖褰帷望  
空明屋角見遙岫良朋不可招塊處慚孤陋青青桃葉  
長奕奕蘭花秀長吟曷咨嗟佳辰去難又

潭溪十詠 錄六首

海棠洲

煌煌海棠洲錦樹臨清灣  
常恨灣頭風吹花走潺湲  
潺湲去不息花亦無由還

懷新亭

茅簷入竹低曠野時寓目  
寂寂農家春新秧滿田綠  
何時稻登場秋山響蓬樸

宴坐巖

青青橈樹林下蔭蒼蘚石幽人宴坐時懷抱忘其適不  
見暮樵歸寒山雨中碧

山館

春林遶舍青門館終日靜吾心樂有餘所遇皆勝境更  
鑿庭下池溶溶浸山影

涼陰軒

北窗何所見疎竹雜遙岑涼飈思有無虛簷動蕭森此  
興何由盡移牀入翠陰



南溪

聊為溪上遊一步一回顧悠悠出山水浩浩無停注惟  
有舊溪聲萬古流不去

入白水訪劉致中昆仲

夜雨歇清曉山椒雲氣昏駕言聊出遊窈窕窮川原側  
帽避橫篠揚袂障晴暉春泉散石壁細草羅丘園陟峻  
已逾嶺窺深更緣源喬松傍澗折垂柯激潺湲過籟寒  
慘慘驚林白翻翻造幽景寥閭勝絕難具論僕夫知余

樂跼蹐為停軒惜無徒倚地時來此開樽暮投鵝峰宿  
青燈耿柴門相從二三子交情久彌敦談玄測象象攬  
佩紉蘭蓀願言固所懷丘壑吾道尊

攜筇

晨起偶無事攜筇出潭川翩翩雙鳬飛宛若導我前林  
靜滴殘雨邨深澹寒煙當春足膏澤俯夏餘清妍野溜  
綠交貫山花紅接連雄觀發新奇勝地窮攀緣據石弄  
驚急班荆蔭連卷幽懷脫塵拘如超混茫先向令作興

來未必勝偶然榮觀事多乖內取樂乃全他時誰繼遊  
此意遙相傳

續賦家園七詠

錄五首

早賦堂

南溪抱山流潤氣滋林麓平生歸歟心寄老一堂足夢  
破午窗陰清風在寒竹

萬石亭

嵐光近却無一徑緣厓斷危亭勢欲飛翠石雲中亂小

山閨清遊懷人發長歎

百花臺

森沉徑易迷  
楮筇為徘徊  
何處春光多  
時登百花臺  
主人淡無情  
林花為誰開

酴醾洞

不愛酴醾花  
愛此酴醾樹  
青條含露滋  
輕陰覆行路  
晝永倦尋書  
時來散幽步

意遠亭

雨餘陂水平徙倚聊一望歸雲淡欲無宇宙何清曠吾  
心游太虛聊寄此亭上

夜行潭溪上念仲原致中喬年茂元伯達皆有  
入山期以詩趣之

長夏不見雨裨暑故相病及茲顛氣回一夕飛灑併攬  
衣步新涼宇宙涵清潤月離南山高水循雙澗靜流觀  
外既洽至樂中潛應緬懷平生友契闊時光運石峰許  
尋盟有約殊未定事紛莽如塵欲埽那得盡年衰覺世

浮慮淡知心勝良遊莫蹉跎小暇即乘興

新涼

新涼為招客勝地非預圖前峰雨未散冷風遶吾廬披  
襟沐清駛合席隨霑濡定知喧譁中欲此一快無興來  
擴以酒草具來須臾田翁偶過我添杯坐其隅為言秋  
暑劇稻畦日凋疎寧辭抱甕勞僅給園中蔬喜茲甘澍  
足普潤無遺墟遙山莽難分綠浪搖虛徐我病不任畊  
歲收仰微租蒙成每自愧一飽便有餘連觴使之醺醉

語雜叫呼野人無他腸我輩恐不如

羅願

梁寺丞見示過嶺新作

凌晨登鬱孤南走韶陽道封疆有申畫山川本懷抱公  
行度寒嶺殘雪故未埽高情無南北反謂茲山小頃來  
我嘗遊亦覺山媚好前賢因遠謫我輩得幽討兩崖瞻  
欲眩數樹攀且繞想公哦新詩千騎轉林杪參伍候顏  
色約束軍聲悄韶陽古名都四十專城早重華已千歲

蒼石在雲表魚龍舞幽壑遺韻蓋可考以茲供撫玩或  
可薦壽考公餘亦時飲未用絕芳醪行行布恩惠正直  
神可保

鹿鳴宴禮成貽解元諸友并通判寺簿及同官  
天意欲為雨川雲出相望明時攬俊乂所立固無方少  
小諷二南美此江漢鄉猥當興能職首闕較藝場羣儒  
悅寬簡浩蕩出文章方觀縱壑魚忽作搏風翔此去升  
禮闈旋當對殿廊忠言動明主家國有輝光



鹿鳴首宵雅義取好賢深寥寥疑莫續工席有遺音詩  
言君臣間不以位相臨如禽食苹水有酒方共斟從容  
陳所好亦復有鳴琴庶使我冠者洋洋動其心願言解  
子褐結綬貫華簪真心有相感千載豈殊今

鄭樵

滌榛

枳棘何榛榛援狄不敢下芳苓何薿薿電霜不敢灑驂  
騶馳曲蘖舉足難寬假所以古之人犁鋤聊自把

蘇籀

木犀花

何處聞國鄉珍木秀巖谷高標蕙蘭枝妙輯沉麝酷葉  
葉秋聲中霏霏蚤英藪介特有如松繁華豈慙菊勃蔚  
襲軒墀薰沾滿衣服情人擢纖指拾藥動盈掬靡蕪見  
離騷苓藿入譜錄卉裳未可更鮑肆或爭逐亂插琉璃  
餅於斯殊不俗

王銍

送純師歸眉山吉祥寺

上人峩嶠秀冥冥聳高風依遊王公間常帶山水容謫  
仙信竒逸蜀僧論絲桐寂默誰為聽誤比萬壑松崎嶇  
古今塗勢利紛其中晚遺似高識物我無異同是心湛  
寒水處處流真空猶嫌百年夢剩此一枝筇忽懷煙霞  
想永念菽水供身為反哺鳥更逐高飛鴻斜日澹歸袂  
不似秋色濃孤行拾黃葉一笑千山重桑宿揮餘戀雲  
樓杳歸蹤從茲與明月相伴落何峰

送王道元運判致政歸潛皖

好山如幽人深絕常避地潛峰獨呈露孤立信奇最高  
擁一峰寒縹緲亂雲氣萬古招行人誰與賞心會我公  
實仙材崑閬失品次挽公青霞襟來作繡衣使終尋汗  
漫遊高舉九霄外行色開畫圖秋容捲新霽造化為我  
娛神超物無累我窮知音稀與世久無味落葉埽不禁  
歲月水東逝愁作送公詩出門更何詣贈言詞亦貧無  
以報高誼野宿慎衣裘寒霜方夜墜

繫舟餘杭門訪西湖金輪寺參上人

北郭望西湖微徑幾尋尺澹與人意長雲寒正無色深  
尋幽禪居步轉蒼山側落葉不可紀遮盡山下石師方  
無定居我亦何所適四海漭無歸老矣山中客百年熟  
機緣還此共禪寂語罷今古分坐上有陳迹一笑視此  
生何事非戲劇開門納遙峰暮雨一江白茲遊非世逢  
歸路晚蕭瑟積陰迷曉昏鐘聲報將夕

登育王山示現塔贈卿璉與三上人

危岫戴寶塔亭亭起虛空金鐸韻廣樂日夜鏘天風氣  
真逼雲漢興逸追鸞鴻嘉有三禪子超曠棲禪宮相追  
不憚遠幽致惟我同興盡歸一默人逐歸雲東平軒架  
絕壑上與絕頂通滄溟忽破碎百川競朝宗斜陽無遠  
近山亂高低紅四表倏明晦變化安可窮夜深風雨來  
陰氣誇驕雄響劇百谷咽靜若一氣融明發石路乾清  
韻生寒松

賦得隔樹見秋燈

隔樹見秋燈青熒更可愛半籠宜葉疎微透嫌枝礙深  
誤暗蟲投靜窺棲羽在望疑簾幕中吟惜欄干外月到  
冷光幽風來孤影碎山客遙夜歸耿耿如相待

中秋招葉子謙

堂上月已滿樽中酒更空故人眇何許出門惟清風不  
如一夕光所至皆能同悄然望玉杵無聲桂影中

范浚

凌霄花

栽松待成陰種漆擬作器人皆笑艱拙往往後得利君  
看植凌霄百尺蔓柔翠新花鬱煌煌照日吐妍媚風霜  
忽搖落大木亦凋瘁視爾託根生枯莖無殘蒂先榮疾  
蕭瑟物理固難恃凌霄亟繁華衰歇亦容易

遊蘭溪靈洞

朝曦杲晴空宿霧開紛披縈紆度墟曲犖确行溪湄橫  
橋轉山腰丹堊明招提豁硯覩陰洞欲入愁途迷流泉  
暗淙琤噴壑跳珠璣巖根石彩翠映水光參差窮高上



蒼岑支策行欹危林端出紺宇兀與浮雲齊曾來念舊  
事歷歷經行時松長向如人今已老十圍我尚喜青鬢  
還年未生絲偕遊數君子意擬探幽竒諸峰未歷覽寒  
日還平西同攜下前麓却望蘭陰歸明年豔陽春更約  
相追隨當須各努力補屐尋幽期

寓居寶惠寺喜晴登山

喜霽出招提愛山登葉友林端已殘照路草猶半濕丹  
崖斷雲歸翠竇飛泉入長天沒鳥影遠水動虹吸塵襟

得恣瞰爽氣橫來集欲逐野僧還更看空翠立

周必大

東宮出示和御製秋懷詩恭和二首

并序  
錄一首

某近者特蒙頒示御製秋懷詩繼出殿下和篇明  
良相賡徵角交作猥緣幸會獲預榮觀蟋蟀候秋  
而吟蓋亦不能自己謹成二篇繕寫投獻仰塵英  
鑑伏深震懼

沛宮歌風雲威德加四海雄詞照千古編簡亦光彩惟

皇與同符興寄秋序改宸章振遠響寂寞咽衆籟有如  
涼飈來殘暑去安在願汎埽氛暄廓廓天宇大

次韻邢懷正孝庸通判遊蔣山

仙人薄蓬萊乘槎度河許舊觀桑田變今訪鍾山古駕  
言出東門恍若之帝所朝曦霽青霜楓葉落紅雨亭亭  
望浮圖隱隱插天宇坡垂北溟黿石臥南山虎遙聞飯  
後鐘絕勝紈如鼓恭惟布金地草木誰敢侮孤芳破冰  
雪喜見梅萼吐同遊皆大雅緇素競先睹巾車似元亮

漱石雜孫楚相將挹靈泉何用照牛渚西方化人國未  
覺道修阻法筵盛龍象一一會心侶茗椀散午夢蒲團  
便軟語懸知雨花社重辨風幡舞相投甚針芥味道真  
酪乳從來草堂靈俗駕回吾祖況如雲仍輩么麼那復  
數後車倘許隨未羨黃金塢

送子開弟還江西二十韻

十年樂家居豈知離別愁言遊冠蓋場聚散靡自由子  
從何方來訪我金陵州情多語反默喜極涕翻流不如

並轡出庶以寫我憂沉沉長干寺南軒清且幽烏衣訪  
王謝煙滅那可求却登覽輝亭下瞰白鷺洲羣山競合  
沓萬室相牽鉤回首指鍾阜黎明戒前騶林泉與臺殿  
勝處皆窮搜紛紛六朝舊莽莽今幾丘弔古轍未環劇  
談興方稠胡為理書劒復欲從遠遊蹉跎六年別邂逅  
半月留臨分敢不盡苦語誠非偷期子如良農勤勤事  
西疇慎勿因水旱而令廢鋤耨豐歲會可必行行真有  
秋十月風霜動待子江之頭

陶淵明有已酉重九詩一首某以此年此日舟  
次吉水距永和才一程耳輒用其韻先寄二兄  
十三弟并呈提舉七兄

王覲十五載歸來稀舊交我髣昔已華今茲固宜凋去  
國甫重五還家倏登高永和有兄弟咫尺如煙霄緬懷  
江東使地遠心更勞遙知上翠微江山勝金焦豈無茱  
萸酒望望心鬱陶相從會有日永矣非一朝

尤袤

庚子歲除前一日游茅山

犯寒出行邁值此歲云除剛風駕飈輪送我游清都華  
陽第八天仙聖之所居洞門劣容人中寬如室廬橫前  
大谿水於焉限塵區其右萬石林錯落空翠圖茅菴著  
深秀細路緣崎嶇幽泉見客喜頗亦類逃虛山深日易  
曛捷徑趨元符琳宮照金碧天籟鳴笙竽側睨白雲峰  
前瞻赤沙湖金壇聳百丈陰洞通七塗俯視人間世擾  
擾真蟲蛆早以冗陋質忝分赤城符豈悟夙昔緣復造

神霄墟平生夢寐處恍若登華胥歸來拜綠章足力尚有餘珍館十六所安能遍遨娛窮探恨不盡太息仍躊躇

游張公洞

并序

舟次湖汊侍季父伯兄游洞靈步行五里夾道皆喬木參天鶴巢其上若笑若咳澗水瀾瀾鳴聲甚悲殆不類人間也入洞靈宮覽前賢留題徘徊久之由石徑里許達於洞深數十丈磴道險絕俯俚



僅可下下寬廣容數百人大石離立或下聳欲落  
若劒盾矛戟相撐拄或蹇連崛起而不斷若虎豹  
蹲伏俯踞而拏攫中有小門持炬乃得入丹竈井  
白在焉由石罅而上皆流石怪形無窮其狀旁行  
屈曲蓋深遠不可到其陽有懸崖滴乳水水流澗  
谷乍細乍大自成宮商橫澗得小閣可憩朱藤纏  
絡崖上丹花簌簌下墜芬芳襲人毛髮凜然欲少  
留而大風作遂歸余遊山川多矣茲游最可紀因

成五百字貽我同志以備他日觀覽焉

吾聞荆漢南有地仙所宅十年勞夢想今日著脚歷扁  
舟下湖泐水漲沒沙磧結纜小橋傍杖藜從此適平岡  
面陂陀疊嶂堆巖積行行三兩里夾道喬木植其木幾  
合抱其高乃千尺風生萬壑響日照四山赤時搖樹林  
杪忽見屋宇脊宮門何崢嶸古道頗修直長廊景曠曠  
崩殿人寂寂寥落昔賢題摩挲壁間墨捫蘿上層巔俯  
瞰得深窟危梯交枝撐鳥道穿詰屈投身乍寬閒跼步

仍逼窄攀援愁顛躋傲睨驚險僻懸崖朶頰頷亂石供  
劒戟白雲何時橫乳溢或自滴中空正瀕洞了不見天  
隙冥行迷近遠偃僂猶擿埴巉巖豈人工隱軫入地脉  
窮幽或篝火俯跪僅容席仙壇尚故處丹竈儼遺跡山  
蟲鳴唧唧野鼠聲嘖嘖傳聞父老語以往真莫測中有  
白玉堂橫絕巨石室傍連洞庭野欲去不可極潛窺目  
先旋縱走膝無力遭迴步西徑突兀出峭壁攬風高枝  
縹藤蔓青陰翳芳草何芊綿丹花亦狼籍躊躇古亭上

頤仰幽澗碧玳瑁下流水磊砢欲落石雖云培塿高氣  
與華嶽敵其南有空穴澹瀕殷幽黑陰風互吞吐冷氣  
森噴逼蛟龍久伏藏金玉闕簡冊靈蹤信茫昧幻怪紛  
慘戚將無神物守欲與世壤隔平生丘壑念蚤歲泉石  
癖豈不思三山所恨無六翮樂哉茲辰遊逸興潛有激  
仙翁在何許綠髮尚如昔髣髴笙簫聲徘徊鸞鶴翼俗  
緣磨不盡夢境坐形役何階築衡茅幽時窮日夕風雲  
西北起天地忽改色倉皇促歸舟造物類戲劇良遊易

非誤真賞難再得寄語山中人重來儻相識

范成大

六月七日夜起坐殿廡取涼

畏暑中夜起出門月露清晶焚臥銀漢錯落低玉繩網  
戶閉妙香石樓樓古燈風從何處來殿閣微涼生桂旗  
儼不動藻井森上征椽楹共突兀鬼物相枝撐彭觥鐵  
拄杖磔磔棲燕驚俗人豈解事鼻息春雷鳴大星送曉  
來四窗炯微明顥氣凜肌骨栩栩兩腋輕乘風欲歸去

驂鸞壯青冥却恐方平知浪得狡獪名

再次韻呈宗偉溫伯

官居數椽間局促如甕牖幸鄰詩酒社金薤對玉友真

清廊廟器偉望配山斗

宗偉自號真清居士

行當侍紫極槐棘位

三九館舍有奇士

謂溫伯

高文粲參首倡酬猥及我雙松

壓孤柳生活從冷淡幸免譽與咎相從結此夏何異歸

隴畝

過平望

寸碧闌高浪孤墟明夕陽水柳搖病綠霜蒲蘸新黃孤  
嶼乍舉網蒼煙忽鳴榔波明荇葉顫風熟蘋花香雞犬  
各村落蓴鱸近江鄉野寺對客起樓陰濯滄浪古來離  
別地清詩斷人腸亭前舊時水還照兩鴛鴦

九月三日宿胥口始聞雁

故人久不見乍見雜悲喜新雁如故人一聲驚我起把  
酒不能觴送目問行李曾雲行路難空濛千萬里塞北  
多關山江南渺雲水風高吹汝瘦旅伴今餘幾斜行不

少駐滅沒蒼煙裏羈遊吾亦倦客程殊未已扁舟費年  
華短纜繫沙尾物生各有役冥心聽行止江郊匝地熟  
場圃平如砥歸期且勿念共飽豐年米

青青礪上松送致遠入官

青青礪上松鬱鬱礪底柏松森上曾雲柏踞抱幽石偃  
植雖不同臭味乃相得千霜與百雪偶立衆芳側衆芳  
豈不好歲晏埽無迹廣廈罩羣木萬牛挽山澤松材可  
世用攀援入王國草木豈有情亦復念離析君看此翠



柏錯莫無顏色孤雲愁月夜獨籟怨風夕蒼官何當歸  
相望長相憶

大暑舟行含山道中雨驟至霆奔龍挂可駭

隕雲暖前驅連鼓訐後殿駸駸失高丘擾擾暗古縣白  
龍起幽蟄黑霧佐神變盆傾耳雙瞶斗暗目四眩帆重  
腹逾飽櫓潤鳴更健圓漪暈雨點濺滴走波面伶俚愁  
孤鴛颭閃亂飢燕麥老枕水臥秧稈與風戰牛蹊爰城  
沉蟻隧洶瓴建水車競施行歲事敢休宴咿啞嘯簧鳴

輾輾連鎖轉駢頭立婦子列舍望宗伴東枯駭西漬寸  
涸驚尺澱嗟余豈能賢與彼亦何辨扁舟風露熟半世  
江湖徧不知憂稼穡但解加餐飯遙憐老農苦敢厭遊  
子倦

秋日雜興六首

我友蓬蒿士却埽謝四鄰內無三尺童外無雙蒲輪豈  
非騏驥姿執轡難其人無衣可御冬忍寒待陽春仰雲  
發永歎夜作寒螿呻參戶勸之起懷寶善自珍秋月耿

清夜秋風捲曾雲佳哉為誰歟定為我與君莫嫌酒味  
薄聊復相歡欣

夕陽下桑柘餘暉挂西山西山在何許冉冉紫翠間綠  
雲無朝昏綠蘿竟暄寒昔與霞上人同跨雙飛翰上凌  
紫霄峰下弄白石湍風吹墮渺莽及此行路難佳人應  
望予我豈真忘還

秋高氣彌清歲晏天雨霜繁枝各病綠况乃枝上香向  
來不勝春渺在無何鄉樂極定自悲誰與此更張春秋

無終窮榮落殊未央

媽媽芙蓉花秀出清霜晨衆卉已昨夢孤芳若為新寒  
蜂無僂飛一笑靜自珍誰令嬋娟姿墮此寂寞濱絕世  
貴獨立後時莫酸辛回風佐小舞薄日生微暉即事亦  
足樂何必桃李塵

蒼筠如蒼玉鄉是礪壑姿竭來西窗下死生付污泥蟲  
緣有病葉土瘦無新枝太陽豈我偏檐影為蔽虧昔如  
松柏獨今作蒲柳衰暮夜風雨急歲晏誰與歸

屋東雙梧桐婉婉無真姿朝為春風條暮為秋霜枝夜  
久風葉鳴驚鵲一再飛梧桐不足愁會有明年期人老  
真可歎寧復遊冶時

曉自銀林至東灞登舟寄宣城親戚

曉山障望眼脈脈紫翠橫澄江已不見况乃江上城結  
束治野裝木末浮三星羸馬隴頭嘶小車谷中鳴亭亭  
東灞樹練練綠浦明篙師笑迎我新漲沒蘋汀徑投一  
葉去雲水相與平聊將塵土面照此玻瓈清懷我二三

友高堂晨欲興風細桐葉墮露濃荷蓋傾凝香繞燕几  
安知路傍情

遊金牛洞題石壁上

仙翁舊遊處琅璈韻靈曲至今有餘音玄鶴舞幽谷衆  
真期我住歲晚芝田熟腰鑱從翁來簫雲跨飛鹿

行唐邨平野晴色妍甚

暖日烘繁梅穠香撲征鞅雲煙釀春色心目兩駘蕩柳  
眉翠已埽桑眼青未放茲遊定不俗前路入千嶂

曉出古城山

落月墮渺莽殘星澹微茫竹輿亂清溪飛蓋入嵐光松  
檜霧靄濕桑麻風露香空翠滴塵纓何必濯滄浪山家  
亦早作迨此朝氣涼林深無人聲木末炊煙蒼離離瓜  
芋區肅肅棗栗場田園古云樂令我思故鄉墟市稍來  
集筠籠轉山忙吏事亦挽我歸路盤朝陽

雪後守之家梅未開呈宗偉

瓦溝凍殘雪檐溜粘輕冰破寒一竿日春隨人意生瑞

葉再三白南枝尚含情定知司花女未肯嫁娉婷官居  
苦無賴一笑如何清落木露荒山寒溪繞孤城朝暮何  
所見雲黃叫飢鷹東風不早計愁眼何當明北鄰小橫  
斜蘚地可班荆憑君趣花信把酒撼瓊英

新館

露稻粘明璫風茅滾高浪荒煙暗白道行行亂蛩響日  
脚午未吐雲頭晚猶漲欣此半日涼籃輿走清曠病客  
不堪暑茲行天肯相蚊蟲掃無迹秋意滿千嶂稍尋泉



石盟略褫簿書障鵠原定相念因風報無恙

盤龍驛

聞雞一唱罷占斗三星沒天高月徘徊野曠山突兀暗  
蛩泣草露怨亂語還咽涼螢不復舉點綴稻花末惟餘  
絡緯豪悲壯殷林樾小蟲亦何情孤客心斷絕魂驚板  
橋穿足側石子滑行路如許難誰能不華髮高城謾回  
首疊嶂屹天闕遙知秋衾夢千里一飄忽

清逸江

微生本漁樵長日渺江海扣舷濯滄浪尚說天宇隘  
竭來車馬路悵悵佳思敗黃塵撲眉鬚驅逐似償債  
羸驂繫偏仄狂犬吠荒怪鄉心入旅夢一葉舞澎湃  
晨興過墟市喜有魚蝦賣眼明見清江積雨助橫潰  
褰裳喚扁舟艤碗不勝載不辭野渡險弄水聊一快

新嶺

瘦馬兀曹騰荒雞號莽蒼絲窠冑朝露籬落萬珠網  
宿雲拂樹過飛泉擘山響老桑跼潛蚪怪蔓挂騰蟒  
山行

何許深空翠滴羈鞅釀愁積雨寒破悶朝日放瞳瞳赤  
幟張昱昱金鉏上浮動草花馥清和野禽唱僕夫有好  
語沙平路如掌惟憂三溪阻橋斷山水漲

祁門

石梁平波心金刹駕巖腹溪藤卷霜繒山骨琢紫玉東  
堂有嘉名窈窕窗紗綠落花埽無迹蕉葉森似東主人  
甚愛客挽袖語陸續衝雨出門去役役媿童僕

王園官舍睡起

公退閑閣臥官居如淨坊屋角斷虹飲日西楊柳黃客  
來束我帶客去書滿牀睡覺有忙事煮茶翻斷香

丙戌閏七月九日與王必大登姑蘇臺招王浚  
明陳淵叔耿時舉避暑次時舉韻

始賀火流西還嗟斗斜閨餘暑猶強顏新涼頗難進燥  
剛渴欲圻焦卷禿如燼炎官扶日轂輝赫不停運登臨  
有高臺勇往得三俊仍將王郎子飛步凌劫仞風從噫  
氣來雲作壞山陣鄉如垂頭魚忽已蟄蟲振空明晚逾

清更要孤月印書生乃易與俛仰更喜愠憑闌天為高  
舉酒山欲近奇書鐵鉤鎖麗句錦窠暈茲遊我輩獨難  
挽軟紅輶君看籠中鳥寧識咸池韻

淵叔出米元  
章書蹟甚奇

玉山道中

常山多清溪玉山富喬木行色鬱蒼然頗亦慰愁目梅  
花隔離見瓏璁照茅屋晚來風刮地想見飄香玉

湘潭道中詠芳草

積雨倏然晴秀野若新沐芳草徑寸姿中有不勝綠萋

萋路傍情頗亦念幽獨驅馬去不顧斷腸招隱曲

謁南嶽

湘中固多山夾岫萬馬屯坡陀無敢高似遜喬嶽尊曉  
投望雲亭衆丘拱牆藩濃嵐忽飄蕩積翠浮雲端天柱  
已峻極祝融更高寒紫蓋鬱當中罔勢洶崩奔峙為赤  
帝峰下直宮壩垣角樓捧雙闕圓方模九閭炎符撫中  
興南正實司天草木薰協氣山林奠神姦妥靈有備物  
龍卷鸞旗軒走忝桂林伯與神俱南轅上謁禮亦宜為

國憂元元心空禍福相古井寒無瀾杯琰不用擲但願

歸田園相傳壁畫好拂拭塵埃昏弓刀立壯士劍珮班

靈官後宮行樂處窈窕千雲鬟錦地舞月晝珠櫳侍春

閒武氏筆已絕梗概猶清妍

後宮壁畫武洞清筆極禁  
禦富貴之趣紹興二十年

火後為雨所敗後人募  
舊蹟更畫猶有彷彿

旋車闔廟去頗厭山市喧勝果

招客遊徑排集賢關梵度絢雜組

衡嶽藏經皆錦絲竹  
簾護之孟蜀時捨簾

乃其戶部侍郎彬所造

錫杖鏘古鐸

開山善果尊者所遺

避雨勝業閣

在嶽祠之

南晚晴留凭闌石廩映岫嶺望眼增孱顏上封眇孤絕

南臺半雲煙碧岫有靈藥朱陵巢洞仙

晚晴乃盡見諸峰

病倦

懶幽討山僧鑄我頑松膠唐李枝柏跼隋初根奇事不

勝紀重遊當細論

廟路三十里夾岸大松五季時馬氏所植勝業寺柏不見根偃於地出八

幹龍蟠占數畝世所未之見傳為隋時物

### 馬鞍驛飯罷縱步

食飽倦輿馬散策步前岡意行踏芳草蕭艾蒼生香春  
事甚寂寥山桃帶松篁遊蜂入菜花此豈堪蜜房今年  
蟄出遲柘葉分寸長好晴纔數日歲事未渠央



興安乳洞有上中下三巖妙絕南州率同僚餞  
別者二十一人遊之

山水敦夙好煙霞適奇懷向聞乳洞勝出嶺更徘徊雪  
林縞萬李東風知我來華裾繡高原故人紛後陪繫馬  
玉溪橋嵌根豁崔嵬蕩蕩碧瑤宮冰泉漱牆隈芝田溉  
石液深畦龍所開勾我一掬慳類此炎州埃仍呼輪袍  
舞醉倒瑞露杯但恐驚山靈腰鼓轟春雷新翁雜餉婦  
園視歡以吟茲巖何時鑿閱世幾劫灰始有此客狂後

會真悠哉南游冠平生已去首猶回歲月可無紀三洞  
俱磨崖會有好事者摩挲讀蒼苔

全守支耀卿飲餞七里倅楊仲宣復攜具至深  
溪酌別且乞余書走筆作此兼寄耀卿

店舍煙火寒塵沙亭堠遠媽紅糝芸綠春事亦已晚年  
芳去跋跋江水來衮衮故人瀟湘逢留落一笑莞已張  
七里飲更出深溪餞草間豔紅粉竹裏趣廚傳故意如  
許長由來共鄉縣愧我不能觴負此離歌囀別愁滿天

末不醉何由遣却意支使君風前白波捲

題嶽麓道鄉臺

山外江水黃江外滿城綠城外杳無際天低到平陸長  
煙貫楚尾遠勢帶吳蜀故園東北望遊子闌干曲

澧陽江

順流下沅江湖流上澧浦水深蘭芷寒漂搖憚風雨采  
采不盈掬何由寄遠渚洞庭浮天白遐矚莽吳楚有懷  
獨寤歎櫓聲與人語暮夜即維舟蒼茫定何許

渚宮野步題芳草

草色沐新雨綠潤如得意披拂欲生煙  
苒苒著巾袂天涯各芳春秦吳千萬里  
故人攀桂枝今夕念遊子

虎牙灘

又名金門十  
二倍屬夷陵

傾崖溜雨色慘淡水墨畫  
辛夷碎花懸魂木老藤挂翠  
莽楚甸窮黃流蜀江下一灘  
今始嘗三峽此其亞雨點  
鼓士摻雲騰挽夫跨驚心度  
石林破眼見邨舍牛眠草  
色裏犬吠竹林鏹步頭可  
樣船安穩睡殘夜

蚤晴發廣安軍晚宿萍池邨莊

夜雨洗煩蒸曉風薦清穆雲頭墮鐵山日脚迸金瀑暑  
塗一日涼遠客萬事足羈人正奔波觀者何陸續翠蓋  
立嚴妝青裙行跣足俗陋介南徼物華入東蜀竹萌苦  
已青荔子酸猶綠修蘆密成籬直柏森似纛泥乾馬蹄  
鬆路坦亭堠速暮投何人莊窗戶暗修竹

蜀州西湖

荷花正盛開水月登舟亭也湖陰亭  
外別有白蓮尤奇蜀中無菱至此始

見之

閒隨渠水來偶到湖光裏仍呼水月舟徑度雲錦地誰  
云不解飲我已荷香醉湖陰玉嬋娟竄立紅妝外何須  
東閣梅悠然自詩思驚風入午暑水竹有秋意采菱不  
盈掬興與蓴鱸會遙知新津宿魂夢亦清麗

古風送南郊

廬阜有佳人顏色皦冰玉不能時世妝蕭然古冠服紛  
紜倚市門組麗眩紅綠妖歌促艷舞飛上黃金屋安知  
乘鸞侶流落墮空谷風泉入環珮月露作膏馥梁肉豈

不珍淪雪煮黃獨聊用慰朝飢歲寒膚起粟綺叢三尺  
塵無路到松竹誰能撫孤桐為奏招隱曲

御選宋詩卷十八

謹案卷十七第二十二頁後二行天地一澄澈刊  
本澈訛徹今改

卷十八第九頁後一行當年紈扇謠刊本謠訛搖  
據劉子翬屏山集改

第三十四頁前一行官居如淨坊按宋詩鈔坊作  
舫此從石湖集專本





欽定四庫全書

總校官庶吉士臣侍朝

校對官檢討臣蕭九成

謄錄舉人臣李駟

欽定四庫全書薈要

集部

御選宋詩卷

十九

詳校官原任主事

臣

李斯咏



欽定四庫全書薈要卷一萬八千三百二十六

集部

御選宋詩卷十九

五言古詩十

陸游

送曾學士赴行在

二月侍燕觴紅杏寒未坼四月送入都杏子已可摘流  
年不貸人俯仰遂成昔事賢要及時感此我心惻欲書  
加餐字寄之西飛翮念公為民起我得怨乖隔搖搖跂

前旌去去望車軌亭鄣鬱將暮落日澹陂澤敢忘國士  
風涕泣效臧獲敬輸千一慮或取二三策公歸對延英  
清問方側席民瘼公所知願言寫肝膈向來酷吏橫至  
今有遺螫織羅士破膽白著民碎魄詔書已屢下宿蠹  
或未革期公作醫和湯劑窮絡脈士生恨不用得位忍  
辭責併乞謝諸賢努力光竹帛

將赴官夔府書懷

病夫喜山澤抗志自年少有時緣龜飢妄出丐鶴料亦

嘗廁朝紳退懦每自笑正如怯酒人雖愛不敢醕一從  
南昌免五歲嗟不調朝廷每哀矜幕府誤辟召終然斂  
孤迹萬里遊絕徼民風雜夷徭封域近六詔淒涼黃魔  
宮峭絕白帝廟又嘗聞此邦野陋可嘲誚通衢舞竹枝  
誰門對山燒浮生一夢耳何者可慶弔但愁癭累累把  
鏡羞自照

憂民多癭無者  
十才一二耳

### 夜讀兵書

孤燈耿霜夕窮山讀兵書平生萬里心執戈王前驅戰

死士所有恥復守妻孥成功亦邂逅逆料政自疎陂澤  
號飢鴻歲月欺貧儒歎息鏡中面安得長膚腴

送金州趙都曹

霜葉無停聲脂車有行色止悲南浦秋又送清湘客啼  
飢兒頰紅侍養親髮白努力事上官世路日已迫

金山觀日出

繫船浮玉山清晨得奇觀日輪擘水出始覺江面寬遙  
波撼紅鱗翠靄開金盤光彩射樓堦丹碧浮雲端詩人

窘筆力但詠秋月寒何當羅浮望湧海夜未闌

將離江陵

暮暮過渡頭旦旦走隄上舟人與關吏見熟識顏狀癡  
頑久不去常恐遭誚讓昨日倒檣干今日聯百丈買薪  
備雨雪儲米滿甔盎明當遂去此障袂先側望即今孟  
冬月波濤幸非壯潦收出奇石霧卷見疊嶂地嶮多崎  
嶇峽束少平曠從來樂山水臨老愈跌宕皇天憐其狂  
擇地令自放山花白似雪江水綠於釀竹枝本楚些妙



句寄悽愴何當出清詩千古續遺唱

繫舟下牢溪游三游洞二十八韻

舊觀三峽圖常謂非人情意疑天壤間豈有此崢嶸畫  
師定戲耳聊欲窮丹青西游過沔鄂莽莽千里平昨日  
到峽州所見始可驚乃知畫非妄却恨筆未精及茲下  
牢戍峰嶂畢自呈下入列坤軸高騫插青冥角勝多列  
峙擅美有孤撐或如釜上甑或如坐後屏或如倨而立  
或如喜而迎或深如螺房或疎如窗櫺我魏冠冕古姁

娜髻鬟傾其間絕出者虎搏蛟龍獐崩崖凜欲墮修梁  
架空橫懸瀑瀉無底終古何時盈幽泉莫知處但聞珎  
珎鳴怪怪與奇奇萬狀不可名久聞三游洞疾走忘病  
嬰竇穴初漆黑偃僂捫壁行方虞觸螫蛇瀕見一點明  
扶接困僮奴恍然出竒罅穹穹厦屋寬滴乳成微泓題  
名歐與黃雲蒸蒼蘚平穿林走驚麋拂面逢飛鼯息倦  
磐石上拾樵置茶鐺長嘯答谷響清吟和松聲辭卑不  
堪刻猶足寄友生

黃牛峽廟

三峽東江流崖谷互吐納黃牛不負重雲表恣蹴蹋吳  
船與蜀舸有請神必答誰憐馬遭刖百歲創未合施師  
浪奔走烹彘陳酒榼紛然餞神餘羹炙爭噉還空庭多  
落葉日暮聲颯颯奇文粲可辨高古篆籀雜邨女賣秋  
茶簪花髻鬟匝襁兒著背上帖妥若在榻山寒雪欲下  
虎出門早闔我行忽至此臨風久鳴喏

航海

我不如列子神遊御天風尚應似安石悠然雲海中臥  
看十幅蒲彎彎若張弓潮來湧銀山忽復磨青銅饑鶻  
掠船舷大魚舞虛空流落何足道豪氣蕩肺胸歌罷海  
動色詩成天改容行矣跨鵬背弭節蓬萊宮

鼓樓鋪醉作

書生迫饑寒一飽輕三巴三巴未云已北首趨褒斜忽  
忽出門去裘馬不復華短帽障赤日烈風吹黃沙俶裝  
先晨雞投鞭後昏鴉壯哉利閭閻崖谷何豁訝地荒多

牧卒往往聞蘆花我行春未動原野今無花稚子入旅  
夢挽鬚勸還家起坐不能寐愁腸如轉車四方丈夫事  
行矣勿咨嗟

十月十四夜月終夜如晝

月從海東來徑尺鎔銀盤西行到峨眉玉宇萬里寬幽  
人耿不寐弄影清夜闌五城十二樓縹緲香霧間不知  
何仙人亭亭倚高寒欲語不得往悵望冰雪顏叩頭倘  
見哀容我躡素鸞掬露以為漿屑玉以為餐泠泠漱齒

頽皓濯肺肝  
逝將從君遊  
人間苦無歡

夜行至平羌憩大悲院

憶昨遊天台  
夜投石橋宿  
水聲亂人語  
炬火散山谷  
穿林有驚鶻  
截道多奔鹿  
今夕復何夕  
此境忽在目  
蒼茫陂十里  
清淺溪數曲  
微霜結寒茸  
落葉拂帽屋  
下馬憩邨寺  
頽然睡清熟  
覺來窗已白  
殘燈猶煜煜

寒夜遣懷

臨觴本不飲  
憂多自成醉  
四方行萬里  
不見埋憂地  
憶

昔入京都寶馬搖香鬃酣飲青樓夜歌聲在半空去日  
不可挽華髮忽垂領娟娟我眉月相對作淒冷月落照  
空牀不寐聽寒蟬早知憂隨人何用去故鄉

雙清堂夜賦

陸子病少間獨臥溪上堂人靜魚自躍風定荷更香素  
月行中天流螢失孤光歸鳥飛有聲度此十里塘嗟我  
獨何事遲暮客異鄉太息搔短髮起視夜未央

避暑江上

苦熱厭城市初夜臨江湍風從西山來頗帶積雪寒堰  
聲靜尤壯噴薄如急灘頓遠車馬喧更覺衣裳單斷岸  
吐缺月恨不三更看且隨螢火歸城扉欲橫關

數日寒頓減頗有春意感賦

微陰寒不力破臘春暗動林梢報梅白水際聞鳥哢羈  
鴻漸整翮一一勞目送應憐飛蓬客猶作浣花夢平生  
江淮間裘馬事豪縱豈知老畏死齋鉢受蔬供忍饒每  
自笑小飲未敢痛何以慰寂寥臥聽壓春甕



秋日登仙遊閣

馬蹄連早暮車塵細如霧誰知此路邊高閣下風馭頗  
傳秋月夕語笑聯杖屨始知仙與人混迹無異處我來  
想鸞鶴稽首祈一顧飛仙不可見惟與白雲遇白雲如  
有情傍我欄角住借問何山來雲驚却飛去

大醉歸南禪弄影月下作

昔我變姓名釣魚散花洲有船不用楫江急聽自流即  
今客錦城醉過百花樓天風吹筍輿快若凌空游月露

浩無際指點隘九州君看塵土中頗有此樂不題詩碧  
玉簡飛仙相答酬酒醒墮何處樓臺海山秋

月夕

開戶滿庭雪徐看知月明微風入叢竹復作雪來聲俗  
塵不待埽凜然肺肝清林深無漏鼓鶴唳報三更

大醉梅花下走筆賦此

閉門坐歎息不飲輒十日忽然酒興生一醉須一石檐  
頭花易老旗亭酒常窄出郊索一笑放浪謝形役把酒

梅花下不覺日既夕花香襲襟袂歌聲上空碧我亦落  
烏巾倚樹吹玉笛人間奇事少頗謂三勅敵酒闌江月  
上珠樹挂寒壁便疑從此仙朝市長埽迹醉歸亂一水  
頓與異境隔終當騎梅龍海上看春色

梅龍蓋蜀苑  
中故物也

廣都江上作

微波不搖江纖雲不行天我來倚杖立天水相澄鮮平  
遠望不盡日落自生煙梅花耿獨立雪樹明前川好風  
吹我衣春色已粲然東邨聞酒美買醉上漁船

遊萬里橋南劉氏小園

佳園寂無人滿地梅花香閒來曳拄杖臘月日已長朱  
橋架江面欄影搖波光奇哉小垂虹夢破鱸魚鄉汀鷺  
一點白煙柳千絲黃便欲喚釣舟散髮歌滄浪可憐隔  
岸人車馬日夜忙我歸門復掩寂歷挂斜陽

張園觀海棠

朝陽照城樓春容極明媚走馬蜀錦園名花動人意嚴  
妝漢宮曉一笑初破睡定知夜宴歡酒入妖骨醉低鬟

羞不語困眼嬌欲閉雖豔無俗姿太息真富貴結束吾  
方歸此別知幾歲黃昏廉纖雨千點裛紅淚

劉郎浦夜賦

平生遠遊心睥睨萬里窄今年下三巴放浪浮七澤菰  
蒲無遠近但見風索索浪高星辰濕天碧河漢白十年  
散醉髮未易著朝幘守符尚可乞來作瀟湘客

雁翅夾口小酌

墟煙淡將散江雨細欲無回風吹衣襟晴光滿菰蒲隱

几樂此時清和如夏初犬吠船丁歸小市得美蔬歡言  
酌清醪侑以案上書雖云泊江渚何異歸林廬

夜泊龍廟回望建康有感

我醉行水上身輕如飛煙魚龍互悲嘯伴我夜不眠羽  
扇揮浮雲月挂牛斗間河漢橫復斜風露方浩然坡陀  
石頭城寂寞七百年世事感予懷竦身入青天

病中懷故廬

我家山陰道湖山淡空濛小屋如舴艋出沒煙波中天

寒橘柚黃霜落穠稬紅祈禳鑿鼓鬧賽雨雞豚空叉魚  
有竭作刈麥無遺功去年一月留行役嗟怱怱今年歸  
興動艤舟待秋風社飲可欠我寄書約隣翁

雨夜

牆西泥三寸牆東草三尺可憐白鹿泉蛙黽紛狼籍濕  
螢如隕星入戶黏几席病夫本嗜睡況此風雨夕永懷  
灤西寺更憶山南驛陳迹不可追昏然墮吾幘

督下麥雨中夜歸

細雨閣邛墟青煙濕廬舍兩兩犢並行陣陣鴉續下紅  
稠水際蓼黃落屋邊柘力作不知勞歸路忽已夜犬吠  
闌籬隙燈光出門罇豈惟露沾衣乃有泥沒胯誰憐甫  
里翁白首學耕稼未言得一飽此段已可畫

春遊

平生樂行役不耐常閉戶今朝新雨霽一笑整巾屨青  
猿導幽蹊春草伴微步雖云尊酒薄蔬果亦略具辛夷  
發高枝楊柳吹墮絮行歌不知遠落日呼野渡橫林已



棲鴉淺水猶立鷺歸來意頗豪古錦有新句

夏夜

夏夜忽已半東岡月初生起行遶庭樹愛此露滴聲漂  
流憶安臥局促念遐征幽懷誰晤語華觴還自傾

螢光喜暗庭桐葉矜冷雨幽人清不寐獨夜誰與處乾  
坤信無情歲月遽如許明發視鏡中鬢絲添幾縷

庭荒蔓草長堂豁爽氣入悠然推枕起聊作倚杖立飛  
螢亦避雨黏棟光熠熠南隣輸稅歸小婦愁夜汲

結屋在郊墟，翛然謝炎熾。  
窗扉故閒寂，水竹亦幽邃。  
飛蟲望燈集，棲燕衝雨至。  
石枕與葛幘，美哉今夕睡。

夜汲

酒渴起夜汲，月白天正青。  
銅甌響寒泉，聞之心自醒。  
井邊雙梧桐，映月影離離。  
上有獨棲鵲，細爪握高枝。  
我欲畫團扇，良工不可求。  
三歎拊庭楯，浩然風露秋。

春曉東郊送客

雨餘氣清潤，迨我送客時。  
翻翻車蓋風，五里城東陂。  
初

旭效花房晨露流桐枝南山卷濕翠更覺光景奇澄潭  
集漁艇邨路亞酒旗欲歸且復留造物成吾詩

秋郊有懷

漫漫蕎麥花如雪覆平野離離豆子莢數枝忽堪把頗  
憶故鄉時屏跡謝車馬水宿依蟹舍泥行沒牛髀作勞  
歸薄暮濁酒傾老瓦縷飛綠鯽膾花簇蘋鯉鮓棄官雖  
未決世念亦已且浩歌續楚狂幽懷欣獨寫

秋山瘦益奇秋水淺可涉出城西風勁拂帽吹脫葉新

霜折栗罇宿雨飽豆莢枯柳無鳴蜩寒花有穿蝶郊行  
得幽曠頗覺耳目愜斷雲北山來欣然與之接挂冠易  
事爾看鏡歎勛業永懷桑乾河夜渡擁馬鬣

自東津泛舟至桐溪

潮生東西津雨暗上下塢蕭蕭亂菰蒲拍拍起鳬鴨吾  
船雖褊小尚可著一榻溪風吹醉頰高枕墮紗帽南山  
浮濕翠偃蹇呼不答安得青蓮公傑句為彈壓

晨入省中偶書

清風拂畫簾初日照素壁花枝蝶小憩草葉露時滴房櫳闌無人溝水聲激激摩挲語枯筇伴我住幽寂

暮歸

意行無所之偶傍陂頭立空邨犬吠豪高樹蟬嘒急風塵一身老海宇萬感集還家日已暮草露青鞋濕

藥圃

少年讀爾雅亦喜騷人語幸茲身少閒治地開藥圃破荒劖瓦礫引水灌膏乳玉芝移石帆金星取天姥申椒

薜蘿輩一一榮可數次第雨苗滋參差風葉舉山僧與  
野老言議各有取瓜香躬采曝泉潔謹炊鬻老夫病若  
失稚子喜欲舞餘年有幾何長鑣真託汝

上書乞再任沖佑

虬枝六尺藤方屋九寸帽人間無處著山水歸寄傲耳  
中聞淵明自我髮未燥高標不可揖七十忽已到明窗  
置經龕奧室養丹竈雖云迫遲暮要足平昔好悠然萬  
念空快若河卷埽寄聲幔亭雲行拜散人號

牧牛兒

南邨牧牛兒赤腳踏牛立衣穿江風冷笠敗山雨急長  
陂望若遠隘巷忽相及兒歸牛入欄煙火茅簷濕

東城

墟落斂暮煙林梢偃新月河橋燈漸闌柳岸船猶發薄  
酒吹欲無佇立搔短髮誰知七十翁歲晚念裘褐

舟中詠落景餘清暉輕橈弄溪渚之句蓋孟浩  
然耶溪汎舟詩也因以其句為韻賦詩

獨鶴還故鄉歸然但城郭出門無與遊所至苦寂寞裏  
飯事幽討此計殊不惡薄暮宿漁家蒼煙帶墟落

維舟入谷口信步造異境隔離雞犬聲滿地梧楸影瓦  
甌炊香稻石泉汲新井人間苦偏仄愛此須臾景

老圃髮如霜見客能廢鋤與坐使之年自云八十餘老  
身六朝民草舍數世居力守遠祖言一字不學書

沿溪得茅店酒旗出柴荆杖頭錢已空一醉何由成主  
人語鄭重手把甕面清勸我姑小留溪魚亦可烹



秦皇酒甕邊古有釣魚磯我來必竟日時挈雙鯉歸白  
鷺真可人常先孤棹飛高詠江練句令人憶玄暉

鏡湖三百里風止鏡面平持以照吾心俗塵安得生散  
髮鷗鷺間萬事秋毫輕誰能拂東絹寫我孤舟橫

朝發雲根寺暮宿煙際橋冷螢濕不飛潛魚驚自跳菱  
船歌裊裊荻浦風蕭蕭平明宿鳥起我亦理歸橈

古祠照滄波老木悶雲洞輕舟不搖櫂止用一風送汲  
井漱甘液埽榻寓幽夢所恨山未深城笳聽三弄

禹穴探斷簡樵風汎清溪倒影森松桂避船散鳬鷺塵  
中有異境十里青玻璃高塢忽招人湖邊日未低  
溪行已清秋還舍尚殘暑天公為解圍簾櫳過疎雨青  
蔬喜小摘紅粒亦新杵一飽坐北軒頻花泣煙渚

六月一日曉賦

視夜明星高蟬聲滿庭樹殘骸幸差健散髮穿兩屨巖  
扉手自開曳杖得徐步碧瓦浮青煙圓荷瀉殘露草木  
無俗姿雞犬共幽趣兒來問晨炊一笑揮使去

春日雜題

梅花三十本圍以疎竹籬入春甫十日開遍南北枝少  
年輕節物老大復苦衰坐見零落盡一杯初未持

客路行無窮漁唱聽不厭濤江西限吳雲岫南入剡蹇  
驢過小市高柳擁孤店去去望前邨鴉歸煙欲斂

夏夜對月

薄雲歸欲盡殘雨久猶滴月入疎林間庭戶燦珠璧梅  
天苦蒸鬱爽氣始此夕豈無一舴艋放浪天水碧散髮

黃鶴樓醉弄白玉笛真當舞魚龍詎止裂金石

避暑松竹間

雙松五丈高萬竹一尺圍上有林蟬鳴下有礪鳥飛正  
午不見日我來每忘歸清詩忽陳前永與世俗違直北  
有異境煙汀連釣磯何當霜雪時散髮櫛葉衣

漁父

千錢買一舟百錢買兩槳朝看潮水落暮看潮水長持  
魚換鹽酪縣郭時下上亦或得濁醪不復計鉗盜浩歌

忘遠近醉夢墮莽蒼玄真不可逢悠然寄遐想

敝廬

敝廬雖陋甚鄙性頗所宜敬傾十許間草覆實半之確  
聲隔柴門績火出枳籬縛木為窋牢附垣作雞埭黃犢  
放林莽蒼鵝戲陂池傭耕食於我客主同爨炊瓦盂設  
大杓殖莧羹園葵一飽荷鋤出作勞非所辭上以奉租  
賦下以及我私有錢即沽酒阡陌恣遊嬉亦有扶持者  
婢跣奴髻椎欲畫恨無人後世考此詩

東岡

東岡竹千竿大者圍過尺微風生其間蕭蕭夏寒碧我  
閒適一到散髮坐磐石萬事不累心清歎遂至夕此君  
本傲世獨我有夙昔老情恐作疎時來寓琴奕

春社日效宛陵先生體

社雨

開歲纔幾時春社忽已及茫茫草色深蕭蕭雨聲急扶  
犁行白水不惜芒屨濕邛童更可憐赤脚牛背立

社鼓

酒旗三家市煙草十里陂林間鼓鼕鼕迨此春社時飲  
福父老醉鬼竅相扶持君勿輕此聲可配豐年詩

社酒

農家耕作苦雨暘每闕念種黍踴麴蘖終歲勤收斂社  
瓮雖草草酒味亦醇醲長歌南陌頭百年應不厭

社肉

社日取社豬燔炙香滿邨飢鴉集街樹老巫立廟門雖

無牲牢盛古禮亦略存醉歸懷餘肉霑遺徧諸孫

大雨

今年景氣佳有禱神必答時時雖閔雨顧盼即霑洽縣  
地千里間四月秧盡插季夏兩三日淒爽欲忘筮瀦水  
如塞河決水如放閘几席亂鼃黽庭除泳鵝鴨舍邊魚  
受釣戶外鷗可狎飛螢最得意終夕自開闔蕭蕭菰蒲  
聲恍若船入夾嗟予亦耐事堅坐書滿榻懸知擺耜收  
已足供伏臘會約張志和清風從蒼雪



山行

山光秀可餐溪水清可啜白雲映空碧突起若積雪我  
行溪山間靈府為澄澈峻嶒崖角立蟠屈路九折黃楊  
與冬青鬱鬱自成列其根貫石罅橫逸相糾結上捫鵬  
鵠巢下歷豺虎穴流泉不可見鏘然響環玦出山日已  
暮林火遠明滅小憩得樵家題詩記幽絕

邨居

舍後盤高岡舍前面平野防盜枳作藩蔽雨篠代瓦

邨人

以簪覆  
屋如茅  
數家相依倚  
百事容乞假  
薄暮耕樵歸  
共話衡

# 門下

## 獨行柳橋而歸

寒雲覆江干  
慘慘雪欲作  
草枯狐兔見  
鷹隼方縱搏  
老翁臥蓬戶  
疾痛在腰脚  
忽覺意稍佳  
快若解束縛  
呼童扶下堂  
西出度略約  
浮波見鳬雁  
決起驚鳥鵲  
籬根犬迎吠  
碓下雞俛啄  
霜餘桑葉積  
春近柳枝弱  
徐行過傍舍  
醉笑盛醕酢  
歲暮農事休  
羨爾羣飲樂

幽居即事

小磴落雪花修綆汲牛乳幽人作茶供爽氣生眉宇年  
來不把酒杯榼委塵土臥石聽松風蕭然老桑苧

屏居江海涯杳杳菰蒲深俛仰夏令中澤國正多陰桑  
椹熟已紫水鳥時遺音偶得一瓢酒鄰里聊相尋

晚聞庭樹鴉鳴有感

烏鵲棲我庭將旦輒散去此豈厭所棲亦以飲啄故一  
飢能驅人擾擾無晨暮不然亦已矣豈樂塵土汙我有

茆三間自少鮮外慕力耕自足食雞豚亦可具晚雖誤  
收名疾走如脫兔六年楓林下不知歲月度殘骸幸強  
健沽酒徧山步

鄉語謂湖山間  
小聚為山步

醉歸每自笑不負此芒

屨平生愛方外雖老冀有遇秋風送片帆更上剡谿路

### 山行

五尺桄榔杖二寸楫櫂冠往來山谷中髮白面渥丹初  
非乳石力所得懷抱寬入寺不尋僧自愛松風寒松風  
晚少靜我意殊未闌却尋歸邨路白石明青灘

夜坐憶剡溪

早睡苦夜長晚睡意復倦  
斂膝傍殘燈拭背展書卷  
時搔短髮稍稍磨凍硯  
更闌月入戶皎若舒白練  
便思泛樵風溪名次第入剡縣  
名山如高人豈可久不見

道上見邨民聚飲

霜風利如割霜葉淨如埽  
正當十月時我行山陰道  
場功俱已畢歡樂無壯老  
野歌相和答邨鼓更擊考  
市壚酒雖薄羣飲必醉倒  
雞豚治羹飯魚鼈雜鮮羹  
但願時

太平鄰里常相保家家了租稅春酒壽翁媪

初寒

重雲蔽白日陂港日夜涸秋風纔幾時已見霜雪作人生各有分豈必衣狐貉吳中冬蔬茂盤飭不寂寞搏泥治牆屋伐篠補籬落薄酒亦醉人問子何不樂

送春

新葉張翠幄落花作紅茵山蔬旨且柔家釀清而淳以我垂老境送此將歸春我固惜流年春亦記陳人江山

處處佳風月日日新寒驢度松岡短檝橫煙津蘭亭人  
已遠遺韻猶清真却下木柵市天風吹角巾

晚步門外

槐葉已成陰楸花已離離日暮門無人迨我逍遙時左  
持漆園書右挾栗里詩風從湖面來成此一段奇石路  
雖甚狹雅稱拖筇枝少頃山月明照我角巾歌

甕池

狸甕東階下濫濫一石水買魚畜其間鱖鱖三十尾力

微思及物為惠止於此無風水不搖得志魚自喜涵泳  
藻與蒲永不畏刀几飯罷時來觀相娛從此始

稽山

我識康廬面亦撫終南背平山愛山心於此可無悔晚  
歸古會稽開門與山對奇峰綰髻鬟橫嶺埽眉黛豈亦  
念孤愁一日變萬態風月娛朝夕雲煙閱明晦一洗故  
鄉悲更益吾廬愛東偏得山多寢食鮮不在寧無度世  
人談笑見英傑御風倘可留為我傾玉瀝



# 南軒

今年秋早涼七月已蕭然南山修竹下枕簟終日眠時  
將半殘夢聽此欲斷蟬推枕起太息四序忽已遷功名  
墮渺茫衰疾方連綿新月獨多情窺窗淡娟娟

## 朱子雲園中觀花

我鬢忽已白君顏非復朱花前一杯酒不樂復何如暮  
看枝上花已覺不如早富貴當及時吾輩奈何老我欲  
君起舞竟日為君留安知花無情不解替人愁長安二

三月花滿上林中祝君早得意歸轡聽玲瓏

楊萬里

人日出遊湖上

放閘冷泉亭抽動一天碧平地踏雪山晴空下霹靂去  
時數點雨歸時數片雪雨雪兩不多山路雙清絕舊臘  
緣多雪新年未有梅慙慙下天竺隔水兩株開

微雨玉井亭觀荷

猛雨打萬荷怒聲戰秋聲水銀忽成泓一瀉無復遺不

如微雨來翠盤萬珠璣荷翻珠不落細響密更稀清如  
雪融窗三更夢開扉對君君不信對鏡當自知

明發陳公徑過摩舍那灘石峰下

遙松煙未消近竹露猶滴石峰矜孤銳喜以江自隔清  
潭涵曦紫碧岫過雲白回瞻宿處隄路轉不可覓地迴  
人絕影山僻虎留跡下有無底潭上有欲落石是間一  
徑橫夾以萬松直樹從何時有陳公所手植陳公今焉  
在徑松自寒碧

昨宵望石峰相去無一尺今日行終朝祇繞石峰側石  
峰何曾遠江路自不直仰瞻碧孱顏清峽如立壁反覆  
得細看何必更登陟後顧江已遠前顧山若塞棹進岸  
自回天水未有極簾欣入絕巘舟愕觸潛石東瞰澹未  
熹北吹寒更寂岸草不知愁向人弄晴碧

澄潭湧晴暈不風自成花回流如倦客出門復還家江  
晴已數日新漲沒舊沙知是前溪雨濕雲尚橫斜山轉  
江亦轉江行山亦行風鬟照玉鏡素練縈青屏我本山

水客澹無軒冕情塵中悔一來事外懷孤征忽乘滄浪  
舟仰高俯深清餐翠腹可飽飲淥身須輕鷗鴟不相識  
還作故園聲

過單竹洋徑

兩山何許來此焉忽相尋摩肩不少讓爭道各載駸喬  
木與修竹相招為茂林無風生翠寒未夕起素陰天垂  
木末近日到谷底深空山時一響已動客子心行到幽  
絕處更聞啼怪禽

清遠峽四首

峽水都是泉，非雨原自足。不知幾滴珠，成此一川玉。旁將山染翠，仰為天寫綠。何當雪月夜，孤艇葦間宿。

清晨霧雨重，不敢開船門。小窗試微啟，逗入一船雲。何曾燒龍麝，香霏繞吾身。身在雲水上，何許覓點塵。

清遠望峽山，山脚無半里。小舟行其間，五日翠未已。並馳兩蒼龍，中夾一玉水。送我到英州，渠當自回轡。

誰開峽山寺，政要避世喧。深潭無來路，斷崖有青天。療

飢摘山果擊磬煩嶺猿人跡今擾擾祇緣一漁船

看劉寺芙蓉

初約山寺遊端為怪奇石那知雲水鄉化作錦繡國入  
門徑深深過眼秋寂寂隔竹小亭明稠紅漏疎碧山僧  
引幽踐絕巘恣佳陟三步綺為障十步錦作壁爛如屏  
四圍搭如帔五色滿山盡芙蓉山僧所手植秋英例矐  
淡此花獨腴澤却憶補外時朝士作祖席是間萬株梅  
冷射千巖石舊遊不可尋雪枝半榛棘

# 後圃散策

花徑雨後涼樹聲風外戰杖屨頓輕鬆兒女同行散少  
者前已失老者後仍倦隔林吹笑語相聞如對面明明  
去人近眇眇彌步遠松杉滿地影一瞬忽不見仰觀紫  
日輪偶度白雲片佳處留再來前山未須徧

## 碧落堂晚望荷山

荷山非不高城裏自不見一登碧落堂山色正對面如  
人臥平地躍起立天半指揮出伏兵萬騎橫隔岸後乘



來未已前驅瞻已遠晨光到巖壑人物俱清絢綠屏紛  
開閣翠旗閃舒卷安得垂天虹橋虛度雲巘老鈴偶報  
事郡庭集賓贊忽忽換山中默默下林坂

舟過柴步寺

野寺隔疎樾遠舟見深殿獨徑通絕崖長縈度微線曩  
遊攜童弱攀岸已震眩前瞻足未到下窺意先轉朝來  
經雲根塵思起清羨野夫三二輩走過疾於箭俛仰二  
十年今老懷昔健

東園醉望暮山

我居北山下南山橫我前北山似懷抱南山如髻鬟懷  
抱冬獨暖髻鬟春最鮮松鬢沐初淨山葩插更妍我來  
猶斜陽我望忽夕煙一望便應去不合久憑欄山意本  
自惜如何許人看急將白錦障小隔青鬢顏近翠成遠  
淡縹緲天外仙誰知絕竒處政在有無間頃刻萬姿態  
可翫不可傳

洪适

擬古 錄六首

行行重行行

行行重行行  
南北各倦遊  
昔人重離別  
一日嗟三秋  
如何三秋暮  
相見尚悠悠  
方寸正紆軫  
何以寫我憂  
仰瞻衡漢移  
俯對蘭菊叢  
臭味雖云同  
光塵若為異  
迴風淒淒且發飄  
我別時袂欲知  
長相思披衣不勝體

青青河畔草

青青河畔草  
英英籬邊菊  
亭亭當窗女  
濯濯手如玉  
淵

淵錦中意粲粲未盈幅  
藁砧天一涯刀頭誤行卜  
却鏡怨新眉誰教遠山綠

明月皎夜光

明月皎夜光瑟瑟扇商籟  
衡紀直西躔雲章斜左界  
感彼林薄凋歲律倏云邁  
蜻蛚誰汝憐悽悽鳴戶外  
昔我耐久朋著鞭遊方泰  
慰籍繒綰輕金蘭舊盟改  
東井不及泉須女無儔配  
君看貢公綦白首愧傾蓋

冉冉孤生竹

冉冉孤生竹成陰幽谷中幸來君子室  
葛藟施喬松喬松千百尋攀附猶可窮  
思君江水深褰裳難為從同心而偏棲  
愧彼摩霄鴻灼灼芙蓉花凌波媚芳風  
非不努力愛秋老無復容昔盟倘不寒  
誰歎久西東

迢迢牽牛星

迢迢牽牛星奕奕停梭女尋盟整瑤轡  
絳情薄漢渚欣讌未斯須別愁眉已度  
黃姑不我留殘機忍重顧翻羨巫山雨  
朝朝楚王遇

明月何皎皎

明月何皎皎舒光瑩窗綺宛轉羞空牀披軒步庭際故  
愛同一心新愁今兩耳咫尺相會難迢迢若千里況復  
千里隔憂端無窮已

史浩

賜宴澄碧殿抵暮錫金蓮燭宿玉堂直廬命作  
季秋中浣日淳熙隆四禩朝回攬轡間中使俄傳旨少  
頃日轉申宣召陪燕喜預令埽玉堂深夜備棲止悚懼

跪承命鳴騶亟穿市絳闕聳皇居非煙常靡靡入自東  
華門熊羆森爪士詔許乘肩輿安徐無跛倚復古距選  
德相望幾數里修廊按雲漢宮堯燦珠蕊中途敞金扉  
恍若蓬壺裏羣山擁蒼壁四顧環弱水山既日夕佳水  
亦湛無滓冰簾映綺疏瓊殿中央峙澄碧耀宸奎龍神  
爭守視蹈舞上丹墀天威不遠咫奉觴祈萬壽時蒙一  
啟齒餘波丐鼠腹酒行不知幾徘徊下瑤席緩步煩玉  
趾從遊至清激錫坐談名理泉聲韻琴瑟一洗箏笛耳

皇云萬幾暇觀書每來此論道及帝王直欲齊其軌堯  
舜禹湯文前身無乃是臣言非獻諛道實由心起既然  
明是心要在力行爾登橋醵餘壘飲興未容已金蓮引  
雙燭再拜離階祀玉音寵諭臣此會宜有紀歸途感恩  
榮占寫忘骭骹

朱熹

擬古八首

離離原上樹戢戢澗中蒲娟娟東家子鬱鬱方幽居濯



濯明月姿靡靡朝華敷昔為春蘭芳今為秋靡蕪寸心  
未銷歇託體思同車

綺閣百餘尺朝霞冠其端飛櫺麗遠漢曲楹何盤桓清  
謠發徽音一唱再三嘆借問誰為此佳人本邯鄲微響  
激流風浮雲慘將寒為言何所悲遊子在河關不恨久  
離闊但憂芳歲闌願為清宵夢燕昵窮餘歡

上山採薇蕨側徑多幽蘭采之不盈握欲寄道里艱沉  
憂念故人長夜何漫漫芳馨坐銷歇徘徊以悲歎

佳月朗秋夜蟋蟀鳴空堂大火西北流河漢未渠央野  
草不復滋白露結為霜梁燕起高飛雲雁亦南翔念我  
同心子音形阻一方不念執手歡隔我如參商禹龍不  
為澤畫餅難充腸金石徒自堅虛名真可傷

鬱鬱澗底樹揚英秋草前與君結歡愛自比金石堅金  
石終不渝歡愛終不疎一夕遠離別悠悠在中途相思  
未云變音容定何如傷彼三秋葉灼灼層華敷盛時不  
可留恐逐嚴霜枯夫君來何晚賤妾長離居

高樓一何高俯瞰窮山河秋風一夕至憔悴已復多寒  
暑遞推遷歲月如頽波離騷感遲暮惜誓閔蹉跎放意  
極驩虞咄此可奈何邯鄲多名姬素豔凌朝華妖歌掩  
齊右緩舞傾陽阿徘徊起梁塵絳繚紛衣羅麗服秉奇  
芬顧我長咨嗟願生喬木陰黃緣若絲蘿

夫君滄海至贈我一篋珠誰言君行近南北萬里餘結  
作同心花綴在紅羅襦雙垂合歡帶麗服眷微軀為君  
一起舞君情定何如

衆星何歷歷嚴宵麗中天殷憂在之子起步荒庭前出  
門今幾時書札何由宣沉吟不能釋愁結當誰憐臨風  
一長歎淚落如奔泉

邵武道中

風色戒寒候歲事已逶遲勞生尚行役遊子能不悲林  
壑無餘秀野草不復滋禾黍經秋成收斂已空畦田翁  
喜歲豐婦子亦嘻嘻而我獨何成悠悠長路歧凌霧即  
曉裝落日命晚炊不惜容鬢凋鎮日長空飢征鴻在雲

天浮萍在青池微踪政如此三歎復何為

友人黃子衡欲之上庠以詩留行

若士有奇操久厭山林卑奮衣千里道已與親友辭  
行何悠悠世路方如茲歸來亦何日車馬光陸離幽蘭  
生前林擢置白玉墀不以芳意遠結根終不移願子崇  
明德潛躍貴因時悲風靜夜聽喬木歲寒姿何以迴軒  
駕千載相與期

奉酬丘子野表兄飲酒之句

微褐不充體寒夜懷重衾古來窮廬士歲暮多苦心  
苦心亦何為世路多崎嶇不藉杯中物離憂坐自侵  
舉杯當勿辭何為復沉吟醺酣遺所拘神慮契遐襟  
荒酒思前戒歡謠發清音雅唱一何高仰酬非所任  
申章聊敘報洪量亦予欽

古意

兔絲附樸檟佳木生高岡弱蔓失所依佳木徒蒼蒼  
兩美不同根高下永相望相望無窮期相思諒徒為同車

在夢想忽覺淚沾衣不恨歲月邁但惜芳華姿嚴霜萎  
百草坐恐及茲時盛年無再至已矣不復疑

送劉旬甫之池陽省覲六十四丈遂如行在所  
上計

雨雪成歲暮之子遠徂征酌酒起相送慨我別離情池  
陽實大藩佐車屈時英子行一請覲上計趨吳京良玉  
懷貞操芳蘭含遠馨臨岐一珍重即此萬里程

晨起對雨二首

淒冽歲云晏雨雪集晨朝高眠適方起四望但蕭條遠  
氛白漫漫風至林靄消流潦冒荒塗清川亦迢迢遐瞻  
思莫窮端居心自超覽物思無託即事且逍遙  
晨起候前障白煙眇林端雨意方未已后土何時乾倚  
竹聽蕭瑟俯澗聞驚湍景物豈不佳所嗟歲已闌守道  
無物役安時且盤桓翳然陶茲理貧悴非所歎

客舍聽雨

沉沉蒼山郭暮景含餘清春靄起林際滿空寒雨生投



裝卽虛館簷簾響通夕鳴遙想山齋夜蕭蕭木葉聲

社日諸人集西岡

郊原暖芳物細雨青春時前岡遐敞地登覽情無遺農  
畝懷歲功壺漿祝神釐我慚里居氓十載勞驅馳今朝  
幸休閒追逐聊嘻嘻笑語歡成舊盡醉靡歸期

雨中示魏惇夫兼懷黃子厚二首

讀書春日晏雨至滿郊園一灑幽叢竹藹藹清陰繁  
齋居無還往鎮日空掩門欲將沖靜趣與子俱忘言

暄風變春餘卉木日蔥蒨林間一雨來滿庭寒草徧寂  
寞謝朋儔晤語懷雋彥良無一水遥阻闊何由見

杜門

杜門守貞操養素安沖漠寂寂閤林園心空境無作細  
雨破新筠微風動幽籜聊成五字句吟罷山花落浩然  
與誰期放情遺所託

晨登雲際閣

晨起踏僧閣徙倚望平郊攢巒夏雲曉蒼茫林影交暫

釋川途念憩此煙雲巢聊欲託僧宇歲晏結蓬茅

池上示同遊者

藕葉蓋波面池花猶未紅聊承曉露餘散步詠涼風香  
氣已飄忽客懷誰與同唯應同遊子芳意更怱怱

自溪口買舟至順昌示同行者

時燠倦長途買舟至西郭煙波方渺然坐此溪上閣子  
留且歡宴我去成蕭索同行不同調此意誰與託

倒水坑作

窮幽鮮外慕殖志在丘園即此竟無得空恨歲時遷川  
陸繇半載煩燠當歸緣憩此蒼山曲洗心聞澗泉

對雨

虛堂一遊矚驟雨滿空至的皪散方塘冥濛結雲氣勢  
逐風威亂望窮山景翳煙靄集林端蒼茫欲無際涼風  
襲輕裾炎氛起秋思對此景淒淒還增沖澹意

齋居聞磬

幽林滴露稀華月流空爽獨士守寒栖高齋絕羣想此

時鄰磬發聲合前山響起對玉書文誰知道機長

又聞琴作

瑤琴清露後寥亮發窗間韻逐回風遠情隨元夜闌端  
居獨無寐林扉空掩關起望星河落哀絃方罷彈

讀道書作六首

巖居秉貞操所慕在玄虛清夜眠齋宇終朝觀道書形  
忘氣自沖性達理不餘於道雖未庶已超名跡拘至樂  
在襟懷山水非所娛寄語狂馳子營營竟焉如

失志墮塵網浩思屬滄洲靈芝不可得歲月逐江流碧  
草晚未凋悲風颯已秋仰首鸞鶴期白雲但悠悠

白露墜秋節碧陰生夕涼起步廣庭內仰見天蒼蒼東  
華綠髮翁授我不死方願言勤修學接景三元鄉

四山起秋雲白日照長道西風何蕭索極目但煙草不  
學飛仙術日日成醜老空瞻王子喬吹笙碧天杪

鬱蘿聳空上青冥風露淒聊乘白玉鸞上與九霄期激  
烈玉簫聲天矯餐霞姿一回流星盼千載空相思

王喬吹笙去列子御風還至人絕華念出入有無間千  
載但聞名不見冰玉顏長嘯空宇碧何許蓬萊山

秋雨

一雨散林表清陰生廣庭喜茲新秋夜起向高齋行煩  
敲獲暫祛涼氛集華纓沉沉遠林氣愜此端居情節物  
坐如此撫世襟方盈歸當息華念超遙悟無生

秋夕懷子厚二首

雨歇林氣爽月華湛遙暉齋居翫物變廓落滄洲期焚

香散碧虛撫節陳清詩抗志屬雲端非君諒誰知  
涼氣沉齋宇夕陰未渠央寒栖屬遙夜長簟卷單牀浮  
雲蔽中天愁霖隔秋窗思君一晤對耿耿何能忘

病中呈諸友

窮居值秋晦抱疾得齋居行稀草生徑一雨復旬餘交  
親各所營曠若音塵疎始悟端居樂復理北窗書讀誦  
興已闌起坐方躊躇綠樹滿空庭策策涼飈初良時不  
復停煩吝未云祛還思對君子日夕佇軒車



冬雨不止

忽忽時序改白日藏光輝重陰潤九野小雨紛微微蒼  
山寒氣深高林霜葉稀田家秋成意落落垂所期曠望  
獨興懷戚戚愁寒饑事至當復遣且掩荒園扉

御選宋詩卷十九